



Actualmain vegn construi a Realta ina nova praschun per praschuniers da l'entira Svizra orientala. Entant ch'il dumber da praschuns sa diminuischa crescha il dumber da praschuniers marcantamain vinavant.

MAD

Il dumber d'arrestads è sa dublegià entaifer 30 onns

Entant ch'il dumber da praschuns sa reducescha crescha il dumber da praschuniers

DA MARTIN CABALZAR

■ **Tranter 1988 e 2017 è il dumber d'instituziuns incumbensadas cun l'execuziun da chastis sa reduci per 30 perschiënt. En il medem temp en las capacitads da plazzar persunas en arrest dentant creschidas per 2002 plazs, quai che correspunda a 37 perschiënt.**

Creschè per il dubel è dentant er il dumber da las persunas arrestadas. L'onn 2017 eran radund 82 da 100 000 persunas en fermanza, l'onn 1988 eran quai anc stad 70.

Il dumber d'arrestads è sa dublegià

Il dumber da las persunas arrestadas è creschè tranter 1988 e 2017 da 4621 sin 6907 persunas, quai che correspunda ad in agument da radund 50 perschiënt. En il medem mument è il dumber da persunas arrestadas pro 100 000 abitants creschè da 70 sin 82. En l'execuziun da chastis penals eran arrestadas 2017 899 persunas dapli che 1988, quai che correspunda ad in agument da 32 perschiënt. Creschè marcantamain è l'augment procentual da las mesiras prematuradas per delicts penals e da mesiras correspundentas e quai per 282 perschiënt u per 765 persunas. En il medem interval è il dumber da persunas ch'han cuntrafatg a la lescha d'esters creschè per 328 perschiënt u per 197 persunas.

Pli paucas, dentant pli grondas instituziuns d'expiazion da chastis

Il dumber d'instituziuns responsablas per l'execuziun da giustia è sa reduci da 152 sin 106, quai che correspunda ad ina reducziun da 30 perschiënt. Succesivamain en praschuns pli pitschnas vegnidas serradas. L'onn 1988 disponiva mintga terza praschun da pli pauc che 10 plazs d'arrest, 2017 eran quei anc otg perschiënt.

Radund ina quarta da las praschuns svizras pudeva recepir 2017 pli che 100 cussadentas u cussadents en cumparegliaziun cun nov perschiënt da l'onn 1988. Tut en tut èn las capacitads da las praschuns svizras s'agumentadas entaifer 30 onns per passa 2000 plazzas d'arrest. Quai correspunda ad in augment da 37 perschiënt. L'onn 1988 stevan a disposiziun per mintga 100 000 abitants 83 plazs, 2017 eran quai 89.

Dumbers stabils tar ils arrests d'inquisiziun e da segirezza

Pli constants en il decurs dals ultims 30 onns èn dentant stads ils cas d'arrests d'inquisiziun e da segirezza. Els varieschan per l'entira Svizra 1279 (1989) e 2097 (2013). En questa categoria da praschuniers tutgan tranter 1988 e 2017 en la media 31 perschiënt dal dumber total dals praschuniers.

Era tenor la repartiziun da decadas (1988–1997), (1998–2007) e (2008–

2017) datti svilups differents tranter las differentas categorias d'arrestads. En l'emprima decada eran 31 perschiënt dals arrestads d'inquisiziun e segirezza da naziunalitad svizra. Il maximum è vegni cuntanschè 1989 cun 44 perschiënt. La cumpart d'arrestads da naziunalitad estra cun domicil en Svizra (inclusiv persunas en la procedura d'asil) sco er arrestads da l'exteriur cun domicil en l'exteriur muntavan a 28 perschiënt, resp. 41 perschiënt da tut ils arrestads.

En la segunda decada ch'è vegnida examinada è la cumpart dals praschuniers svizzers sa reducida per 11 perschiënt sin 20 perschiënt.

La cumpart dals arrestads da l'exteriur è dentant creschida en tuttas duas categorias. La cumpart d'arrestads da naziunalitad estra cun domicil en Svizra muntava a 37 perschiënt, la cumpart dals esters cun domicil en l'ester a 43 perschiënt.

En la terza decada è la cumpart dals arrestads svizzers restada stabila cun 20 perschiënt. La cumpart dals arrestads che derivan da l'exteriur, ch'han dentant domicil en Svizra, è nudada cun 28 perschiënt, quai che correspunda a la procentuala da l'emprima decada.

En il medem temp è il dumber dals esters cun domicil en l'exteriur creschè sin passa la mesadad (52%) dal dumber total dals praschuniers.